

PM lawat Melaka Sabtu ini

MELAKA, Selasa — Perdana Menteri, Datuk Seri Dr. Mahathir Mohamad akan melakukan lawatan separuh rasmi sehari suntuk ke Melaka Sabtu ini.

Ini adalah lawatan pertama Datuk Seri Dr. Mahathir sejak menjadi Perdana Menteri, malah Melaka adalah negeri pertama dilawatnya secara separuh rasmi.

Menurut Pengerusi Sambutan Lawatan Perdana Menteri, Encik Mohammad Jais yang juga Ahli Exco Kerajaan Negeri hari ini, Perdana Menteri akan diiringi oleh isterinya, Datin Seri Dr. Siti Hasmah.

Bellau dan rombongan yang akan tiba dengan helikopter TUDM, akan memulakan lawatannya merasmikan Akademi Laut Malaysia dan penyerahan piagam serta upacara penyampalan sijil kepada lulusan kadet dan kelasi di Tanjung Dahan Kuala Sungai Bahru 35 batu dari sini.

Datuk Seri Dr. Mahathir akan tiba di padang Sekolah Menengah Rahmat, Kuala Sungai Bahru kira-kira jam 8.50 pagi Sabtu.

Ketibaannya disambut oleh Ketua Menteri, Encik Mohd Adib Haji Mohd Adam dan isteri, Puan Zainiah Hussein, Timbalan Menteri Dalam Negeri, Encik Abdul Rahim Datuk Thamby Chik juga Ahli Parlimen Bahagian Alor Gajah, Ahli-ahli Exco Kerajaan Negeri, wakil-wakil rakyat, ketua-ketua jabatan kerajaan dan pemimpin-pemimpin masyarakat.

Encik Mohammad berkata, lebih 10,000 terdiri ahli-ahli parti komponen Barisan Nasional, pertubuhan-pertubuhan sukarela dan orang ramai akan menyambut ketibaan Perdana Menteri.

Bellau memberitahu, lebih 2,000 murid sekolah akan berbaris di sepanjang jalan dari Sekolah Menengah Rahmat sehingga ke akademi laut.

Rombongan Perdana Menteri yang menaiki kereta ke akademi laut akan didahului oleh 101 penunggang motosikal berbagai kaum dan tiba di situ jam 9.25 pagi.

Ketibaan Perdana Menteri akan disambut oleh Pengerusi Yayasan Latihan Pelaut Malaysia, Tengku Tan Sri Ngah Mohamad, Pengetua Akademi Laut Malaysia, Sheikh Othman Ahmad serta pegawai-pegawai dan kakitangan akademi.

Selepas upacara perasmian akademi, penyerahan piagam dan penyampaian sijil kepada lulusan kadet dan kelasi, Datuk Seri Dr. Mahathir dan isteri akan menghadiri jamuan makan tengah hari di situ.

Jam empat petang, Datuk Seri Dr. Mahathir akan menghadiri jamuan Hari Raya Adilfitri di kediaman Encik Mohd Adib di Seri Peringgit.

Bahan asal dari Arkib
Negara Malaysia